

Progetu po Pauli

Arrastus de arrexonamentus a pitzus de sa lingua sarda po su progamu de sa giunta cumunali noa de sa bidha nosta.

Cun custus fuedhus si bòlidi proponni una manera noa de interventu a pitzus de sa lingua sarda e sa cultura campidanesa, siada po dhu allogai, siada po dhu amanniai e prusapestu po dha imperai o torrai a imperai, in calisisiada mamentu de sa vida sotziali paulesa.

A pustis de essi lòmpius a s'otonomia de s'aministradura nosta, eriseru, ma oi, immoi boleus lompi a s'otonomia de s'imperu de sa lingua sarda. In pagus fuedhus: *Fadeidhu e naraidhu in sardu.*

Cun custa crai eus a traballai a pitzus de sa lingua, circhendi de fai oberri fintzas in Pauli s'*Ufitziu* de sa lingua sarda. Custu *Ufitziu* s'ada permiti de ponni in consideru mannu s'importàntzia de is scioberus de su traballu de s'Aministradura Cumunali nosta. Cumentzendi diaderus una manera noa de si movi aintru de sa cultura-lingua-istòria sarda chi ndi pòtzada circai de bessiri, lassendidhas a a nai e fai a is àturus, de *is cosas bècias sceti de mortus*, ca de aici si bòlidi sceti incotiri sa lingua e sa cultura sarda. Aici no prus e sceti propostas de sarvai e allogai *cosas bècias*, ma unu traballu linguìstigu iscientìfigu e nou chi impunnada ogus a su tempus benidori de sa Sardìnnia.

Esti po custu ca si prexaus de cunsillai su traballu in duus tempus:

Ita si srebidi in sa Domu de sa lingua e
in sa cascita de is ainas po su traballu linguìstigu?

- 1) Oberri s'*Ufitziu linguìstigu in su Cumunu de Pauli* cun assumancu duas personis chi tènganta cumpetèntzia e sa praticesa linguìstica, numenadas po fai sceti custu

traballu. Custu *Ufitziu* dèpidi tenni unu *front office* obetu po su pùbrigu, e in prus un'àteru aposentu cuncodrau sceti po is fainas chi pertocanta s'*Ufitziu*.

2) *Is ainas de s'Ufitziu*: Cumpudadori, unu giassu Internet de s'*Ufitziu*, indiritzu po sa posta eletròniga, telèfonu. Àteras ainas chi no amànchinti in s'*Ufitziu* dèpinti essi: liburus po una biblioteca: Fuedhàrius antigus, nous e de oi, de s'imperu, istòrigus, etimulògigus, partigularis (nòminis, piscis, bidhas, matas...etc..) de sa lingua sarda, cartas geoistòrigas, arrepertòrius toponomàstigus, antropònimus, pubricatzionis de leis in sardu a cumentzai de *Sa Carta de Logu, Cundaxis, deliberas, literadura...*etc., fintzas a lompi a is cosas chi srèbinti ònnia diri a totus.

PO FAI ITA?

Lompi a donai sa visibilitadi chi minèscidi a *sa lingua sarda, campidanesa de Pauli* cun:

a) Pubrigatzionis de àutus de s'Aministradura Cumunali fintzas in *lingua sarda*.

b) Istùdiu po torrai a imperai sa toponomàstiga in lingua sarda de sa cussòrgia *cumunali de Pauli*.

c) Produzioni de materialis de informatzioni in *lingua sarda*: Avisus, bandus cumunalis, calendàrius de is festas, de is manifestatzionis sportivas e curturalis. Afortiadura de sa visibilitadi e s'imperu de sa *lingua sarda* ponendi cartellus: in is arrugas, a s'intrada e bessida de Pauli, in is butegas, artisanus, ufitzius e in totu is àteras atividadis chi srèbinti.

d) Traballai cun sa lingua e po sa lingua sarda in is scolas a cumentzai de: asillus, elementaris e mèdias. Circhendi prima de totu de traballai po sa formatzioni de is maistus po lompi a una didàtiga noa de sa *lingua sarda*, circhendi is mellus pubrigatzionis noas a pitzus de s'imparu de is linguas.

f) Bodhiri totu is documentus de is traballus fatus e imperaus in is scolas sardas e de Pauli, po podi cuncodrai un archìviu, cumenti a un'ispètzia de bangu, po donai

oportunitadis de godàngiu ecunòmigu a pitzus de sa *lingua sarda* de eriseru, de oi e de su benidori de sa Sardìnnia in Oropa.

e) Traballai in manera diversa e de cuncodrai beni in is *Scolas Mèdias Superioris* chi s'agànta in Pauli: in su I.T. Industriali “D. Scanu”, e in su IV ITC po Arraxoneris “E. Besta”; e in is Scolas de Specialitzazioni po Insegnantis Scolas Mèdias e Superioris, is **SISS** de s'Universitàdi de Castedhu, chi trabàllanta in su “D. Scanu” e in sa *Cittadella Universitaria*, in sa bia po Sestu. Sa pròpiu cosa po “su nostu” Alberghieru IPSAR “A. Gramsci” chi esti in s'Axrola.

Cussu chi eus iscritu no esti sceti una sighia de disìgius, ma bòlinti e dèpinti essi cosas chi srèbinti a lompi a arresultaus chi si pòtzanta biri, o prus mellus, intendi, ligi e gosai de totus.

Po produiri ita?

Illuegus

- 1) Cartas geogràfigas, cartellus stradalis, cun sa toponomàstiga torrada in lingua sarda: *Beni benius a Pauli*.
- 2) Calendàriu de is festas prus mannas de sa Sardìnnia, cun s'antro-toponomàstiga in lingua sarda, e cun cussas prus importantis chi si fèstanta in Pauli.

Logu de arregorta, archìviu e *data base* de is materialis didàtigus prodùsius po s'imparu de su Sardu.

Prus a trigadiu

- 3) Arrassìnnia o *Festival de sa Lingua sarda* cun cuncursus e atividadis chi fàtzanta cannosci is traballus, is bideas e sa circa científica in lingua sarda.
- 4) Circai po dhus podi imprentzai totu is traballus fatus de paulesus o fatus in Pauli, traballendi in paris cun sa biblioteca de Pauli.
- 5) Bodhiri is siendas po ndi pesai unu Museo Etnogràfigu de sa Bìngia/Binnenna/Binu, cun s'agiudu de is bingiaderis de Pauli e mancai de sa *Cantina Sotziali* de Pauli.